

摘藻堂四庫全書薈要

集部

欽定四庫全書薈要卷一萬五千七百六十五

集部

盤洲文集卷十五

宋 洪适 撰

內制五

賜王之望辭免端明殿學士不允詔

朕承洪業託士民之上若涉淵水未知攸濟思得天下之傑合謀相輔以成治功故高位厚祿所不敢惜以卿有慷慨之志更中外之久廼自首諫躋之政塗今蓋未幾也而雅懷莫遂公論弗孚雖欲留以自近顧不可得

書殿美職乃進退大臣之優禮何至遂有掛冠之請哉
賜步軍司後軍統制崔臯辭免鄂州觀察使不

允詔

朕注意戎事醲於用賞高秩美官未嘗愛惜執此之信
有如皦日卿扞敵淮壤厥有茂勲吉語首馳朕心以懌
觀風之任躡等而遷益思盡忠勿事冲避

賜錢端禮辭免參知政事兼權知樞密院事不
允詔

昔舜命九官濟濟相遜奮庸亮采靡事不理朕甚慕之
卿學足以行道識足以決疑入踐鈞樞能斷國論疇咨
選衆宜幹政機兼冠宥庭助我經武搆詞相推無媿於
古渙汗不反亟其祗服

賜虞允文辭免同知樞密院事兼權參知政事
不允詔

朕以眇身獲保宗廟天下治亂在予一人非邦家之英
同德一心裨助萬務則安能有濟哉卿充積學問練達

事機中外踐更所言可績比參宥畫具見良圖宜副本
兵兼預政柄贊襄之效倚俟有成祇服恩榮無勞謙挹
賜王剛中辭免端明殿學士簽書樞密院事不
允詔

朕兢兢業業一日二日萬幾寤寐有德之輔天下賢哲
肯從我遊者吾能尊顯之卿有佐王之學有拔俗之材
入從出藩咸著顯聞復還禁路風望隱然入助籌帷孰
曰不可循牆之避非所願聞

賜戚方辭免捧日天武四廂都指揮使不允詔
宰輔以汝求免廂部事入奏夫爵祿者朕所以厲世磨
鈍也介冑之士有安邊卻敵之効達於朕聽賞不旋日
惟恐忘其功也卿忠不顧身名副其實旂常有紀褒律
匪私宜略撓詞亟祇茂命

賜皇子少保鄧王愔生日詔

新穗歷於三微甫迎獻歲視莫階之雙秀厥有休符為
吾元子之祥得彼列仙之壽爰推恩渥以頌熾昌

賜大尉昭信軍節度使曹勛生日詔

歲籥更端方歌青燁之曲禁門通籍不隔赤松之游式
盼牢醴之珍用介袞旄之壽

賜簽書樞密院事王剛中生日詔

勅剛中獻歲發春景踰三宿元精生佐秀括五行爰推
盼式之常以相壽祺之永

賜左武大夫宜州觀察使龍大淵辭免落階官
不允詔

朕踐好之始擇材為使必得長於專對者以堅二國之盟卿講習古訓識慮淵深久於潛藩終始如一盡忠致主畏遠權勢出入禁闥厥有休聲張旌越畝弗憚遐阻俾脫橫列正名廉車慶不虛行無事撓固

賜陳康伯乞解罷機政不允詔

朕以菲質膺太上傳授之重蚤夜懍懍不敢以位為樂念宰相助理萬機圖任之失則不特噬臍之悔而已故力起舊德還以魁柄袞繡復來即日無甲兵之問顯相

肇祀天闔其祥殆亦燮理之效也方倚碩望尊彊朝廷
雖目青未平顧豈不能奉我清閒之燕坐而論道乎上
印勾歸朕不敢聽

賜參知政事虞允文乞宮觀不允詔

君為元首臣為股肱蓋一體相須所以合謀同德計安
天下者也卿輔政半載屢告嘉猷筋力方強思慮甚審
何嫌何疑遂欲引疾而去詳味來章深所未曉

賜虞允文乞宮觀不允更不得再有陳請詔

卿秉尊朝之德有憂國之風造膝惓惓備見忠款朕方倚以為治庶幾虜厲無前之績未嘗有纖介之間也移疾旬閑何易退如是耶載覽所陳難以曲徇

賜知福州趙子淵乞致仕不允詔

大夫七十而致仕蓋血氣既衰懼其漏盡鐘鳴而不知止足之戒故先王制禮大為之防而後世以此約三尺之法也烏有神明之胄筆橐之傑齒髮鼎盛治有能名而欲抽簪高蹈則國家安得而從之囊封啓來政爾辭

費亟其視事勿復卧閣

賜凌景夏辭免復徽猷閣直學士不允詔

朕推紫壇之澤于四海無遠邇之間況甘泉之舊乎卿
性資夷粹操履端方出鎮藩維有慈祥之政入司銓部
有平允之聲歸憩叢祠未尋故步茲還內閣之職實聽
輿人之言奚用撓章尚留茂渥

賜王大寶辭免禮部尚書不允詔

卿履道醇固蓄德雄剛從列諫坡積有令問退休林壑

恬適泰然趨節遠來得惓惓不忘君之誼入對文石筋力未衰宜長春官用資獻替之益已膺渙命奚事搆文賜趙密再上表辭免少保不允仍斷來章批答省表具知朕講修軍政睠遇戎臣念堅甲利兵嘗冒死亡之地故高秩厚禮特優終始之恩茲宿將之告休以貳公而佚老使師衆益思於報國知朝廷不負於用人朕命已行汝辭毋再所請宜不允仍斷來章

賜賀允中再辭免知樞密院事兼權參知政事

恩命仍斷來章批答

二老來歸於西伯以齒為尊九官相推於舜朝匪辭所
命我圖耆艾俾典事樞庶幾制勝於兩楹如彼運籌之
三傑國有成渙人無間言當思遇合之難共講治安之
策畀之召節既不鑿坏以為高覽此奏函何乃叩閣而
未已

賜文武百寮湯思退等上表請皇帝御正殿復
常膳不允批答

涉秋以來天作淫雨害我穡事朕仄席輟餐惕然靡寧
天哉荐至夫豈偶然朝思夕惟顧無以仰答謹告雖沴
氣欲解而沈沒之田農方告病公卿大夫有足國惠民
之策能紓我之憂則為愛君復常之請姑置之可也

賜湯思退等再上表請御正殿復常膳不允批
答

永初遇雁電之異不陳庭下之車祖己戒雉鼎之祥尚
改廟中之祀顧予不德方古有慚雨集七八月之間遂

成積潦郡災什四分以上迨及數城雖采納於讜言亦
舉行於荒政莫救西成之害不勝南面之憂惟卿薦貢
於誠衷在朕正懷於抑畏上棟下宇難講大昕之儀右
哉左殽敢豐中昃之御

賜湯思退等三上表請御正殿復常膳允批答
朕罪已畏威便坐未嘗安席齋心食淡厚味不復充庖
永念咎端敢為文具雖恐懼於斯而踰月顧貶損何足
以應天卿等咸造廣廷屢騰需牘具陳稽古之訓深見

尊君之誠陞九級而上廉勉從來請物百饁以俟饋祇
媿多儀所冀責難之恭交修除害之利

賜楊存中上表再辭免同都督江淮軍馬不允
仍斷來章批答

卿材資果毅謀慮沉深百戰摧堅屢奏藁街之捷八營
掌武久尊蘭錡之權時有弛張色無喜愠茲邊塵之未
靖豈王事之可辭當思注意之隆必奮折衝之効夫李
靖專用兵之善蓋房杜濟之以文若子儀堅事上之誠

故齊晉比之為禰宜黜冲節往副廟謨

賜王之望再辭免參知政事不允斷來章批答
朕臨淵思濟寤寐實深外而一路一州之寄內自即吏
九卿而上曷嘗易以印綬與人況一二輔弼所與斷天
下事而繫國家重輕者哉以卿通達治體文武憲邦事
不避難精於遠慮必能同德合謀興今復古無愧於烝
民車攻之詩茲用決之朕心峻登政路非以私卿一已
之榮也卿當體朕責成之意夙夜孳孳同寅和衷發舒

賢縕以振可大之業屢章不已非所望焉

賜錢端禮再辭免簽書樞密院兼提舉德壽宮
不允仍斷來章批答

朕仰惟太上皇邁德勛華以神器之重傳歸在于雖一
月三朝竭四海之奉而綵衣問寢不獲旦旦左右若稽
皇祖嘗以廷臣領使於慈宮朕跽以有請而聖德謙托
因仍未遑也以卿受知兩朝出入禁闥况材高識遠籌
邊甫歸當此治外宜在樞機之廷崇我孝養立我武事

一舉而兩得之又何辭焉

賜虞允文再辭免同簽書樞密院事不允仍斷

來章批答

夫右府本兵蓋顯戎政北樞垂象寔接階符茲求藝圃之英俾贊籌帷之密既輿言之相慶猶遜牘之重陳雖謙冲者君子之常而忠力者股肱之事當思多壘遂展勝謀勿徇撓情以留渙命

賜陳康伯再辭免尚書左僕射不允仍斷來章

批答

辛巳之役中外騷然卿坐于廟朝智略輻湊雍容談笑
能解非常之紛今邊陲受敵丞相位虛思我舊人式遏
亂略揚廷之後詔札屢頒袞衣來歸國人胥慶宜攄遠
業遂寢撫詞

賜錢端禮再辭免參知政事兼權知樞密院事
不允批答

卿練習世故有猷有為踰度世事猶燭照數計而龜卜

也朕知卿之材舊矣邇者贊右府兼政柄啟沃設施有
久大之業試可而遷人望咸允辭至於再吾意不然

賜虞允文再辭免同知樞密院事兼權參知政
事不允批答

文武之枋繫於東西府二三大臣通國之望也朕以卿
碩材不器輿誦所歸俾佐事樞揆策詳審俾參朝政告
猷允臧詳試而進朕命不易雖復深詞難徇來懇

賜王剛中再辭免端明殿學士簽書樞密院事

不允批答

朕延登民望參筦神機陟三傑以同時監百王而治內
庶賴多筭匪求近功卿契合於潛藩崢嶸於禁路去國
之久靡人不稱甫持橐以尊朝宜擁樞而立武當遵批
語遂絕撓函

賜文武百寮宰臣陳康伯等上表奏請御正殿
復常膳不允第一批答

朕念戍邊之暴露躬避殿之焦勞雨雪載塗有感出車

之詠鉤星在漢未遑交戟之朝上天儲悔禍之休鄰壤
結寢兵之好雖擐甲枕戈之士將遂歸期顧垂衣列鼎
之儀敢尋盛典

賜文武百寮等再上表奏請御正殿復常膳不
允第二批答

朕比警邊塵歌采薇而遣戍每懷戎幕慚細柳之勞軍
難因多壘之平便講正朝之禮薦披來牘具見勤誠宜
思治內之方姑緩復常之請

賜文武百寮奏請御正殿復常膳宜允批答

朕徹禁衛於兩階甫閱七旬之久損牽牢之百品敢陳
八物之珍念暴師露衆之勞行修德責躬之事雖得沉
烽之報未施挾纊之恩顧卜郊近齋宿之期欲上壽講
昕朝之禮勉從忱請徒積媿懷

賜吳璘辭免太傅新安郡王不允斷來章批答
朕執爵祿之柄以厲世磨鈍雖五兩之綸半通之銅未
嘗輕以假人况茅社之封槐鼎之任乎卿英望鴻烈為

中興第一卓馬來朝國人相慶大庭孚號僉曰允哉而
執謙再三偃俸之恭猶未已使朕褒顯功臣之意鬱而
未伸卿亦安取此亟其拜命勿復費辭

盤洲文集卷十五

欽定四庫全書薈要卷一萬五千七百六十六

集部

盤洲文集卷十六

宋 洪适 撰

內制六

撫問犒設荆襄將士口宣

有勅卿等奮忠許國擐甲臨邊暑往寒來暴露良苦有
懷制閫茲選近臣益勉功名用酬恩意今差戶部尚書
新湖北京西路制置使韓仲通撫問荆襄將士其犒設
依兩淮宣諭司體例支給想宜知悉

賜三省官滿散天申節道場香口宣

有勅朕孝仲蠖濩瑞接虹流卿等集朱紫于周行達緇黃之善頌名薰有賜神策斯增今差某官賜卿等香想宜知悉

賜樞密院官滿散天申節道場香口宣

令行九夏節紀千秋有若樞機之賢式嚴蓬貝之祝芬香是錫福祉斯迎

賜殿前司滿散天申節道場香口宣

六幕迎薰千齡紀節有若羽林之將載嚴貝葉之宮錫
爾寶芬助予孝治

賜皇子鄧王慶王恭王滿散天申節道場香口
宣

王卮講家人之禮金簡受仙官之祥惟時王邸之賢能
盡孫枝之孝寶薰是錫壽祉斯崇

撫問賀允中到闕并賜銀合茶藥口宣

卿驅馳道路密邇郊關迺將恩篚之頒徃問行驂之次

用申眷待益輔葆調

賜趙密辭免少保不允批答口宣

卿枕戈之久解紱而歸已出褒章用光晚節撫文可略
拜命勿遲

賜少保致仕趙密告口宣

卿懇辭宦路歸憩田園緬懷百戰之勞已陟三孤之貴
出綸有賜承命為榮

賜賀允中辭免同知樞密院事斷來章批答口

宣

載稽夙望誕布明綬升筦斗樞茂經天緯輿情相慶冲
節可蠲

賜湯思退口宣

卿鼎席望尊籌帷慮審不改燮調之職俾專摠統之權
已告昕庭宜祇茂渥

賜楊存中辭免同都督斷來章批答口宣

朕疇咨良帥共督諸軍庶有橐弓之期遂臻奠枕之治

往圖躋績勿事撓辭

賜皇子鄧王慶王恭王滿散會慶節道場香口

宣

卿竭孝蘭陔歸誠蓮刹介八千春之眉壽緒十二部之尊經爰賜寶芬益嚴勝會

賜三省官滿散會慶節道場香口宣

卿等輸忠衛戟展敬名藍欲崇箕翼之符廣集乾川之祉迺加頒錫以助薰嚴

賜樞密院官滿散會慶節道場香口宣

卿久問兵甲來歸廟堂次舍之間神明所護宜有恩頒之寵以咨匡薄之勞

賜趙密落致仕權殿前司職事告口宣

朕疇咨一老復衛千廬士氣既增輿言咸愜宜祇綸命庸副眷懷

賜王之望辭免參知政事斷來章批答口宣

卿學擅洽聞材堪大任茲陟鈞衡之貳甚諧中外之瞻

宜視批章遂蠲來牘

郊祀畢宣勞將士口宣

朕修報觚壇逆釐齋幄衛社賴六師之武周廬閱三宿
之勞式對嚴凝良深嘉獎

撫問少保恩平郡王璩到闕并賜銀合茶藥口
宣

卿比趨召節來相郊裡蒙冒霜威馳驅江路庸推盼式
以示眷私

傳宣撫問宣押陳康伯赴行在口宣

朕焦勞宵旰注想儀刑申遣使璫徃迎召駟所期倍道
以副虛懷

賜湯思退提舉太平興國宮告口宣

卿存騰需牘祈解冢司載嘉勇退之風莫遂挽留之意
茲盼制渥宜體倦懷

賜楊存中都督江淮軍馬告口宣

邊塵方起閫制匪輕賴總督之得人能掃除而安國已

朕褒律宜服渙恩

撫問張綱到闕并賜銀合茶藥口宣

卿虔趨一節密次九闕宜飭使貂往詢來駟恩朕有式
眷倚惟深

撫問陳康伯到闕并賜銀合茶藥口宣

卿不憚三冬載馳千里副吾論相之意知汝致君之忠
宜有恩朕用申眷遇

賜錢端禮辭免簽書樞密院兼提舉德壽宮斷

來章批答口宣

此稽輿論俾陟宥廷仰以奉於慈闈遠欲清於邊祲宜
祇茂命勿治搆章

賜虞允文辭免同簽書樞密院事斷來章批答
口宣

朕延登邦傑進列機廷所賴遠謀以排外侮宜肩忠報
勿治搆詞

賜陳康伯告口宣

朕眷求元老復位上台輿望適歸妖氛自卻宜膺書贊
以展經綸

宣押陳康伯赴都堂治事口宣

朕延想柱石有如渴饑行旆非遙我心則喜申戒貂璫
之使趨臨政事之堂勿復趨趨用酬眷倚

賜陳康伯批答口宣

卿跋履川谷肯為朕來整頓乾坤誰出卿右其展經綸
之蘊勿修撓避之文

撫問楊存中賜金合藥口宣

卿久督戎旃茲周歲籥念風威之區薄知幕府之勤勞
爰出恩帑用資賙護

撫問諸大帥并賜鞍馬口宣

歲律將更邊城良苦分禁閑之上駟助戎幕之神旗祇
服恩盼益思忠報

賜錢端禮斷來章批答口宣

卿望高兩地象應三階掌朝政於中臺本兵權於西府

當酬眷倚母守謙撫

賜虞允文斷來章批答口宣

卿學蓋尊王材堪謀國進躋樞貳益起巖瞻宜體批章
遂蠲冲牘

賜王剛中斷來章批答口宣

此采師言俾登宥地乾綱獨斷渙命已行當諒至懷勿
拘遜禮

賜蒲察久安告口宣

卿比逢郊類獲相盛儀厥有明綸用敷祭澤徃其祗服
思稱龍光

賜吳璘告口宣

卿擁旄乘塞卓馬造朝爰舉徽章用膺褒律亟其祗服
式副倚毗

賜吳璘辭免太傅新安郡王不允斷來章批答
口宣

朕涓辰之吉敷命於庭褒答元勲詩契輿論其祗茂渥

遂寢撫文

賜王彥加恩告口宣

朕此講郊禋普推祭福若時尅將宜出綸言用示眷懷
亟其祇服

賜三省官滿散天申聖節道場香口宣

卿等萃千官於仁宇祈萬壽於慈庭以若忠勤深嘉
尚名薰之賜法會是崇

賜三衙滿散天申聖節道場香口宣

卿等庀職周廬輸忠報上開梵宮之法席祝慈殿之遐齡爰錫寶薰用嚴勝會

郊祀畢端誠殿受賀樞密宣答宰臣詞

有制朕惕奉慈謀肇禋吉土賴上台之顯相協吉日以涓成翕受厖禔言旋清蹕禮成之慶與卿等同之

端誠殿宣答樞密詞

朕黃流假廟紫燎充壇惟元祀之熙成賴鴻樞之陪輔

端誠殿宣答筦軍詞

朕嗣守邦圖初修郊類賴爾干戈之衛肅無陞陞之譁
已受神釐遂廻詔蹕

麗正門肆赦宣答宰臣詞

燔柴泰時接風馬之靈旂旋軫端闈霈星雞之渥澤敷
錫之慶與卿等同之

賜四川宣撫使吳玠夏藥勅書

五月四日

勅吳玠卿權尊帥閫威震坤維當鑠石流金之時勞鍛
甲摩劒之事遠頒珍劑庸示媿懷今賜卿銀合夏藥并

統制統領將佐官屬並依年例分賜仍傳宣撫問故茲示諭想宜知悉夏熱卿等各比好否遣書指不多及

賜保信軍官吏軍民僧道耆壽等示諭勅書

勅保信軍官吏軍民僧道耆壽等朕以張浚宣力於外閱時茲多眷惟耆哲之臣閔勞軍旅之事趣來歸而調燮廼懇請於退休已疏異等之恩特寵三孤之上相攸樂土畀以節旄諒草木之知名必室家之相慶今特授張浚少師保信軍節度使判福州依前魏國公加食邑

一千戶食邑實封四百戶故茲示諭想宜知悉夏熱汝等各比好否遣書指不多及

賜南平王李天祚厯日勅書

朕欽天治厯稽古頒常仰齊七政之文用協九疇之叙
睠言南服夙慕華風欲知來歲之宜當講新書之錫諒
循月令以格時和

回賜南平王李天祚勅書

卿奉藩丹徼慕義清朝拜覃渥之褒綸馳方輶之珍物

備殫忠恪深用歎嘉

賜階文龍州經略使吳拱等夏藥勅書

卿蒙犯隆暑勤勞極邊城池斯固於金湯介胄或生於
蟻虱匪昉有式注想不忘

賜湖北京西路制置使虞允文淮東西路宣諭
使錢端禮王之望夏藥勅書

卿潛筭折衝皇華護塞寬吾旰食勞汝暑行廼昉賜式
之珍以助生經之衛

賜福建路安撫使張浚夏藥勅書

卿甫離揆路借重价藩當炎赫之御辰恐驅馳而失叙
廼分良劑用輔生經

賜荆湖南路安撫使黃祖舜夏藥勅書

卿在時舊德為國長城當三夏之炎暉念重湖之卑濕
爰舉匪頒之式庶迎善耆之休

賜江東安撫使汪澈銀合臘藥勅書

卿遠擁帥牙時當寒籥雖有神明之相豈無區薄之勞

爰出恩盼用資顧嗇

賜江東安撫使汪澈銀合夏藥勅書

卿譽偃朝紳權尊宮籥茲履長羸之序恐違嗇養之宜
爰錫上奩用盼溫檢

賜御前都統制郭振等銀合夏藥勅書

卿權尊制閫任重干城式當炎燠之辰或有晦明之疾
宜頒良劑用表嫺懷


賜四川制置使汪應辰銀合夏藥勅書

卿遠開幕府靜鎮坤維聿臨九夏之時宜有萬金之劑
爰推賜式用示眷懷

賜吳璘夏藥勅書

薰風入律畏日流金豈無霑汗之勞宜有衛生之助庸
盼珍劑以表眷懷

盤洲文集卷十六



總校官進士

臣

胡

崇

校對官庶吉士臣章宗瀛

膳錄監生臣張廼理

欽定四庫全書薈要

集部

盤洲文集卷十七

七至
九

詳校官助教臣謝登雋



欽定四庫全書薈要卷一萬五千七百六十七

集部

盤洲文集卷十七

宋 洪适 撰

內制七

太一宮介福殿開啓太上皇帝本命道場青詞

維年

月朔日嗣天子臣

御名

恭遇光堯壽聖太上皇帝本

命之辰謹遣某官命道士二十一人於太一宮介福殿
開啓靈寶道場一晝夜滿散設醮一百二十分位點上
生命燈一壇謹上啓聖位伏以風薰紀序迓慈闈元命

之辰星度垂光崇睿筭長生之祉颺輪在上藥笈具陳
庶通格帝之誠獲盡事親之孝臣無任

太一宮齊明殿開啟天申節道場青詞

伏以仰東井之躔斯臨永晝竭南陔之養更慶誕辰虔
叩曾宮肅陳法席所冀博臨之況益崇難老之祥

萬壽觀純福殿開啟天申節道場青詞

伏以電樞稽瑞垂金鑑於千秋雲陞臚驩上玉卮之萬
壽寶壇夙啓秘笈屢繙更迎滋至之休永介無疆之祉

南郊奏告天慶觀報恩光孝觀青詞

伏以燔泰時之柴將迎長至降昕庭之札已肅前期仰
覬博臨助成昭報

南郊奏告元天大聖后青詞

伏以事先稽古禮大報天將陟頌祇之堂初款棲真之
宇乞靈藥御集祉觚壇

郊祀奏告天慶觀青詞

伏以祓神丘而稱祀將講盛儀款琳宇以告期仰徽嘉

既惟乾坤之所助幸雨雪之不逢虔布忱衷覬竣熙事
太一宮郊祀預告祈晴青詞

伏以先庠假廟將嚴薦裸之儀萬衛適郊遂展燎熏之
報仰覬神明之祐俾無雨雪之虞淵鑒不違禋容斯備
太一宮郊祀前七日預祈晴霽青詞

伏以卜獻歲之上辛逢元日之吉亥始嚴廟裸遂舉郊
柴仰覬乾坤之休俾無風雨之阻

太一宮郊祀畢謝晴青詞

伏以卜辛日而用郊陟午階而奠幣神明所相雨雪不
逢既竣事以逆釐敢儲精而拜貺

萬壽觀純福殿開啓太上皇帝丁亥本命道場
青詞

伏以慈宮增德沓迎神筴之休商律題期旋次命元之
紀虔遵冲式誕啓清壇仰徼金簡之光長上玉卮之壽
太一宮介福殿太上皇帝丁亥本命道場青詞
伏以葭律吹灰初屆清商之候萱階視蔭斯推始命之

辰仰淵覆之無私為慈庭而有禱庶迎帝祉式介皇齡
太一宮齊明殿開啓壽聖太上皇后生辰道場

青詞

伏以日臨西陸澄景甚休天佑南陔純坤有慶肅延真
御前祓祕庭仰繫覆燾之仁丕錫熾昌之福

萬壽觀純福殿開啓太上皇帝丁亥本命道場
青詞

伏以天運無窮臨旻秋之季月日躔有次慶基命之元

辰延飛馭於蒼圓介壽祺於慈殿仰邀靈貺永祚昌圖
太一宮介福殿開啓太上皇帝丁亥本命道場
青詞

伏以氣動潛葭換杪秋之懿律慶流慈宸推正命之休
辰載祓邃庭聿陳馨醑仰導信基之福益增神筴之符
茅山崇禧觀啓建會慶節道場青詞

伏以日臨析木之津聿逢誕序天闢三茅之洞爰啓清
壇仰延飈御之光具繹琅函之祕庶臻保右永錫熾昌

萬壽觀純福殿滿散會慶節道場青詞

伏以良月就盈斯逢誕序上天佑德已錫蕃釐法會備成真科有考更賴照臨之施咸躋仁壽之隆

太一宮崇禧殿滿散會慶節祝太上皇帝太上
皇后聖壽道場青詞

伏以肇寒律于三冬聿臨初度祝慈庭之萬壽仰叩上
圓願迎藥笈之休式展蘭陔之報

太一宮介福殿開啓太上皇帝丁亥本命道場

青詞

伏以天象蓋高神心善應屈慈庭之元命啓祕宇之清
壇仰祈顧諟之私增畀熾昌之福

萬壽觀純福殿開啓天申節道場青詞

伏以伯趙司至氣和吹律之中華渚流虹節紀稱觴之
次夙陳法席仰介慈齡更迎覆育之休永錫壽臧之祉
太一宮為民間疫癘祈禱道場青詞

伏以高高在上不冒綿區林林而羣仰依洪造茲履炎

歆之序尚多疵癘之人爰被靈壇大開醮席敢覬甄陶
之施咸收藥石之功

滿散青詞

伏以天降之災或爽雨暘之候民殃於疫遂多哭泣之
聲茲啓清場已周法會仰祈慈覆益賜嘉生

太一宮滿散會慶節祝太上皇帝太上皇后聖
壽道場朱表

伏以壇開靖館儀訖沖科虔布誠心幾九閭之格帝永

伸孝養以四海而奉親

郊祀奏告天慶觀滿散朱表

伏以律對黃鍾

續改作節
迺青遠

報伸紫時肅清壇而先告秩

元祀以非遙仰集美光慶成鉅典

太一宮滿散天申節道場朱表

伏以儀備清壇福徼寶笈復投誠於淵覆願介壽于慈
宮永庇羣編丕隆洪祚

萬壽觀滿散太上皇帝本命道場朱表

伏以祕館敷筵肅挹颺旂之馭僊科考式具繡寶櫝之
文仰賴天休常共子職

太一宮滿散太上皇帝本命道場朱表

伏以展儀祕殿訖事清壇惟悃悞之上通斯高明之俯
格式資道妙永錫慈休

太一宮滿散太上皇后本命道場朱表

伏以裒黃冠之衆

闕

瞻紫極之榮光迎此神釐歸諸慈

壺永對九秋之籥共尊萬壽之觴

萬壽觀滿散太上皇帝本命道場朱表

伏以僊科如式寶笈終篇名薰縹緲以縈風列炬熒煌而奪月集殊休于法會隆曼壽於親庭

太一宮滿散太上皇帝本命道場朱表

伏以按琅笈之靈科飈旂來下企珠躔之景緯夜漏已深寶供備成修齡永錫

崇禧觀滿散會慶節道場朱表

伏以祓寶席于名山飛密章於穹漢用導厖鴻之祉式

光震誕之期法會備成皇休茂對

萬壽觀滿散會慶節道場朱表

伏以寶壇閱月具按冲科菲德動天密迎純嘏更冀無私之覆益宏有截之休

太一宮滿散太上皇帝本命道場朱表

伏以祓清秘宇披考真科期帝鑒之不違致皇齡之有衍永依慈寶共庇涵生

萬壽觀滿散天申節道場朱表

伏以協華系統誕聖紀期清場仰接於飈旂冲式已周
於月律茲罄再三之祝願臻億萬之祥

太一宮滿散太上皇帝本命道場朱表

伏以冬灰欲半夕漏甫中具閱靈篇已修馨供仰徼天
祐永相親闡

太一宮滿散預告郊祀祈晴朱表

伏以虔被清場具遵洞式敢期默相賜以時暘仰瞻明
概之祥獲受宴娛之祉

萬壽觀滿散天申節道場朱表

伏以儀肅清壇福種慈殿已匝三旬之式益崇萬壽之
祈淵鑑弗違慶圖有賴

太一宮滿散郊祀畢謝晴道場朱表

伏以寶壇肅啓法會崇成大哉覆燾之私有此清明之
賜式迎景貺用庇函生

太一宮滿散為民祈禱道場朱表

伏以就涓綦宇備考真科薰修已閱於半旬康樂浸綿

於萬井更徵鴻祐盡掃積疴

皇帝賀壽聖太上皇后生辰表文

伏以清商叶序燦南極之瑞星沙鹿發祥紀東朝之誕
節騰權宮壺降嘏霄琅中賀恭惟德厚儀坤明遵遯日
葛之覃兮于中谷久播徽音夏之興也以塗山特書彤
史六珈偕老萬壽維祺臣仰奉慈顏欣逢令旦披圖按
牒覩芝莖十二之華設席肆筵上椿歲八千之頌

皇后賀郊祀禮成表文

伏以禮講泰垓秩百神而受職澤流端闕斂五福以錫
民熙事崇成羣倫胥慶恭惟重華協帝下武繼文肇郊
旅而分年偶邊虞而遷日避新陽之近晦蓋遵藝祖之
規卜嗣歲而用辛遂踵太宗之制况值三朝之始益來
四表之驩妾仰儷乾明猥居坤極際鴻儀之獲考集柔
抱以交忻

閏十一月起居櫓宮諸帝旦表文

伏以柔荔迎時甫踐長於信宿中榆立閏茲告朔之休

辰共惟道邁百王德齊七政扇皇風於有截綿寶厯于
無疆式展孝思敢恭明薦

諸后旦表文

伏以葭吹六琯甫過書雲斗指兩辰斯為附月恭惟道
光坤則德儷乾儀齊太姒之徽音嗣塗山之逸響敢虔
芳薦式罄時思

諸帝望表文

伏以置閏嚴冬歸餘暢月風力已侵于獸炭霜威頗犯

於狐裘恭惟累洽重熙同條共貫紀無前之偉績垂不拔之元基惕奉燕謀敢陳嘉獻

諸后望表文

伏以寒籥過中斯遇歸奇之象素輪既望載深追遠之情恭惟沙鹿垂光河雎協詠配紫宸之聖德播彤管之芳塵式想柔儀竢增孝慕

永祐陵攢宮翻瓦抽換殿柱等畢工告遷徽宗
皇帝神御還殿奉安表文

臣伏以恭繕寢園載新楹桷嚴夙興之香火奉月出之
衣冠爰諏吉以寧神冀發祥而燾後

奏告昭慈聖獻顯恭顯肅顯仁懿節皇后表文
伏以土木訖功棟梁除舊企仙園而在望奉大練以來
娛仰迪燕寧敢伸絜告

郊祀畢奏謝聖祖及上帝表文

伏以始登紫時大報蒼圓奏六變之音率循祫典謹一
純之薦丕講彌文慶熙事之涓成按沖科而拜況

郊祀畢奏謝諸宮觀帝后表文

伏以慈庭詒燕泰時肇裡用日之辛蓋襲卜郊之制事
天靡闕遠超蕝野之儀鴻祀既成先猷所相敢伸昭報
永迪孚休

南郊奏告諸陵并攢宮表文

伏以氣迓黃宮禮行泰時有覲協華之德初修報本之
祠顧瞻威神徵求保佑

盤洲文集卷十七

欽定四庫全書薈要卷一萬五千七百六十八

集部

盤洲文集卷十八

宋 洪适 撰

內制八

六月朔日蝕祭太社祝文

伏以累三光之明震驚涼德修六官之教寅畏格言式
遵伐鼓之文敢絜用牲之告

陰雲不見祭謝太社祝文

伏以季夏之朔太陽有青側身修行未燭其咎雲陰忽

興不見薄蝕惟神敷佑敢薦忱誠

修整太廟大殿屋脊及東廊奏告諸室祝文

伏以積雨建瓴太室穿漏載薪茨蓋已集工師涓日之
良執邁以告

祭告土地祝文

伏以暑雨盈旬廟瓦毀落乃練時日鳩工繕修神其相
之以底終吉

南郊奏告天地祝文

伏以慈闈有命凜乎基業之承陽律惟時肇此郊丘之
薦報二儀之況施救百吏之虔共先事貢誠彛章踵故
於先期敢絜修於明薦

南郊奏告太社祝文

伏以禮大南郊甫嚴祀典饗行八牖用報神休方誕告
於先期敢絜修於明薦

南郊奏告太稷祝文

伏以禮大郊丘甫嚴祀典祠修官稷用報神休方誕告
於先期敢絜陳於明薦

南郊奏告宗廟祝文

伏以受命慈闈承祧累歲始行郊燎之禮將薦廟籩之誠已戒前期敢伸虔告

南郊奏告太一宮十神太一祝文

伏以祀有多儀事尊肆類已諏穀旦誕播札書徼福貴神告虔嘉薦

南郊奏告安穆皇后祝文

伏以三歲一郊累朝故事御圖之始初講彌文欽惟淑

靈監此預告

南郊奏告安穆皇后殯宮祝文

伏以迎休圭景展事觚壇已降札書聿嚴柴燎顧瞻園
寢先告吉蠲

南郊奏告南嶽南海南瀆東瀆祝文

伏以祀著邦彝禮尊郊類候一陽于六律扶羣望之百
神告此前期厥惟故事

郊禮修飾太廟奏告祖宗祝文

伏以禮講觚壇祭先宗祐風雨久侵于墻祀斧斤將易
於棟楹茲卜日以告遷覲在天之委社

郊禮修飾太廟權奉安祖宗神主祝文

伏以工役已具日時既良廼祓齋房奉移遷主仰
假少迪安寧

郊禮修飾太廟奏告安穆皇后祝文

伏以郊丘之祭宗廟必修易腐撓之榱椽治頽穿之墻
壁動茲斤斧告以豆籩

郊禮修飾太廟祭告土地祝文

伏以郊祭有期繕我太室揆日之吉或斲或圻維土有神監興茲役

太廟修飾畢工告遷神主還室祝文

伏以載新廟寢已訖工徒諏令旦以陳遵奉靈旂而反
祐顧瞻在上昭假無疆

太廟殿室畢工奉安祝文

伏以郊柴不遠廟祿為先廼修觀德之宮仰迪寧神之

社奉安之吉潔告惟虔

別廟告奉安之吉作音徽如在

郊祀前二日奏告太祖太宗配侑祝文

伏以肅壇時之嚴裡甫迎至景推祖宗而昭配

續改作卜壇時

于上辛式遵故事推祖宗而並侑

誕舉彌文大報有期先事而告仰祈

右序用相休成

太廟祝七祀祝文

伏以卜郊展報假廟薦芳祭咸秩于百神禮先行于七

祀靈光來格熙事備成

分祭太社太稷祝文

伏以土穀大神生殖之本茲伸吉報于國之南刺豕割
羊壇有遵俎來假來享匪今斯今

土正勾龍氏后稷氏祝文

伏以惟神之靈配食社稷土爰稼穡實尸其功練日報
天子郊用牡美芳嘉薦用迪孚休

郊祀奏告五嶽祝文

伏以穆卜天正

續改作
夏正

將郊上園崇嶽戕戕吐符作鎮

敢徵況施濟此明裡

又四瀆祝文

伏以郊丘之日曾不三旬

續改作
兼旬

有赫瀆祇靈光如在

敢徵陰相俾訖嚴裡

改郊奏告天地祝文

伏以秩元祀于觚壇初伸大報候初陽于嶰籥將講盛
儀會邊禋之不寧懼齋心之有闕惟藝祖避近晦之日
至太宗行上辛之郊稽此前規卜之首夏覲乾坤之錫

祉使疆場之銷兵庶竭忱誠遂成熙事

奏告宗廟祝文

伏以郊類有期邊塵遽起仰遵祖武改卜長羸之初敢
覬神休克展泰元之報

安穆皇后祝文

郊禋有日邊事忽興憲我前規改之首夏欽惟英淑有
以相之

安穆皇后攢宮祝文

始祓神丘將嚴大報會邊隅之有警恐齋戒之不虔遵
改卜之舊章覲如存之陰相

前一日輓祭嘉會門神祝文

伏以郊柴在辰皇輿夙駕兩輶之祭昔者有儀于豆于
登取羝以薦惟神擁右安行玉蚪

郊祀日分命九宮貴神祝文

伏以受乾坤之降嘏合丘澤以薦馨爰修蒹藻之誠用
叩飛棊之時冀垂沖監獲歲上儀

金人犯邊用兵奏告四聖五嶽祝文

伏以敵國犯邊尚肆虐劉之虐師徒駐野未收攘卻之功敢布忱誠仰干英鑒兵行如鬼雖妖祲之結蟠漢箭有神冀威靈之佑助假公山草木之力成京觀鯨鯢之封

奏告顯應觀旌忠觀吳山忠清廟祚德廟祝文
伏以金人犯邊迨茲踰月介冑綦布未有成功虔露忱
衷祈于祠下神威顯相早遂驅除如公山草木之靈建

泚水風聲之績

仲秋薦獻安穆皇后祝文

伏以時及蕭辰祭修園寢顧瞻咫尺想念平生薦此芬馨歆吾誠意

郊祀前二日景靈宮分詣奏告中後殿祝文

伏以迎日之吉事天益虔

續改作履端之始卜日用辛

祭必有尊祇

見發祥之祖禮非敢後分遣侍祠之臣望矣孝熙右茲

裡祀

景靈宮天興等殿孟秋朝獻祝香文

孟秋屆候法駕親臨恭焚寶香供養聖祖天尊大帝伏
願祀事崇成神休來萃奏慈宮而同慶躋壽域之咸寧
恭薦苾芬載申頌禱稽首歸依無極大道

壽聖太上皇后生辰功德疏文

伏以祥開長樂迓載夙之嘉辰教演真筌起無涯之勝
福具嚴冲式益介慈齡壽聖太上皇后伏願淵覆護持
神光臨燭鮎背兒齒慶壽母而永歌象服翟衣偕天王

而難老

秦光大長公主出殯祭文

惟靈天津稟瑞帝渚騰輝蘭行桃姿女圖章灼采繁采
藻婦職無虧問我諸姑介然遺老災生寶婺壽不百年
延瞻素帷無從出涕卜兆有日夕奠是陳尚其顧歆寄
此悲惻

皇帝閤春帖子六首

其一

藻景升暘谷條風拂紫宸只今天一笑萬物總為春

其二

解律春灰動青陽奏雅音上辛元日是郊類合天心

其三

閏接殘年臘春留半月冬雪深田易墾歡喜匝三農

其四

寶勝新幡下九霄千官接武趨春朝玉卮上壽慈顏喜
歲歲年年舜事堯

其五

挽得天河洗塞氛
非煙協氣作新春
使車已動兵車息
活却生靈百萬人

其六

退朝講武與修文
何暇尋春到玉津
桃李不言渾望幸
從來未識屬車塵

皇后閤春帖子五首

其一

雪放梅粧出風嫌花信遲發生皆帝力載物本無私

其二

池面冰漸破潛魚聖得知倚欄觀綠皺流荇欲參差

其三

君王盛德卻紛華六寢蛾眉不好奢曾從芝輶看芝草
爭來椒壺頌椒花

其四

裁紅翦翠不為難開盡千花頃刻間德壽宮中雕輦駐

慶雲深處彩衣斑

其五

葱葱瑞靄騰椒掖
莫莫仁風扇葛覃
四海預應期樂歲
六宮今已喜先蠶

隆興二年南郊鼓吹曲

六州歌頭

嚴更永
今夕是何年
玉衡正鉤陳
粲天宇
起祥煙
協風
應江海
安瀾重規仍疊矩
聖主乘乾堯授舜
盛事光前

稱壽玉卮邊三年親祀一陽回律八鄉承宇

續改作璿
杓東轉上

辛卜旦觚陞紫為壇仰天顏齋居寂誠心肅禮容專存鍾

石約輿衛五輅不求全聽金鑰虎旅無眠儼千官須期
顯相嘉邁一人儉德動天淵費減大農錢神示格宗祧
燕人民悅祉福正綿綿

十二時

庭有燎疊鼓鳴鼉更問夜如何信星彪列天象森羅虞
旦閔宮畢觴清廟漿柘尊犧繼猗那嘉頌可同科卮聖

萬肩摩飭躬三宿泰時縉儀多丘澤合嶽瀆從曦娥神
光燭雲車風馬芝作蓋玉為珂奉瑄成禮燔柴竣事休
嘉砮隱丹闕湛恩波共願乾坤隤祉邊鄙投戈覆盂連
瀚海洗甲挽天河欣喜色長遇六龍過奏雲和三脊
薦嘉禾

奉裡歌

吹葭綬籥氣潛分雲采宜書壤効珍長日至一陽新四
時玉燭和勻

續改作青陽振蟄氣潛分仙掌非煙壤
効珍年勝舊日逢辛酉時玉燭初勻

物

欣欣造化轉洪鈞郊之祭孤竹管六變舞雲門自古嚴
裡犧牲具粢盛絜豆籩陳袞龍陟降幣玉紛綸徹高閭
靈之歆神哉沛排厯昆侖九歌畢盈郊瞻禋燎斗轉參
橫將旦天開地闢如春清蹕移輪闐然鼓吹相聞簫祥
雲騶臚八陞釐逆三神聖矣吾君華封祝慈宮萬壽椒
掖多男六合同文

右三曲嚴更警場作

降僊臺

漏殘杳靜雞聲遠到高燎入層霄雲表蟠瑞靄天步下
嘉壇旗旆飄搖黃麾列仗貔貅整氣壓江潮導前從後
盛官僚玉佩間金貂望扶桑日漸高陰靈霜雪底處不
潛消輦路祥飈披拂絳紗袍雲間端闕仰峩巍播春澤
喜浹黎苗禮成大慶鰲三抃受昕朝

右一曲禮畢皇帝降壇作

正宮導引

重華天子長至

續改作
泰時

奉神虞九奏會軒朱星暉雲潤

東方曉拜貺竹宮初歸來千乘護皇輿瑞景集金鋪雞
竿高唱恩書下惠露匝中區

右一曲皇帝還宮作

盤洲文集卷十八

欽定四庫全書薈要卷一萬五千七百六十九

集部

盤洲文集卷十九

宋 洪适 撰

外制一

錢端禮兵部尚書都督府參贊軍事制

武部所掌五兵文昌甚高八座必望實素諧於輿論則
登用可彊於本朝具官某敏識炤微清才露穎渾金璞
玉備和氣於四時錯節盤根發新硎於游刃自審禁密
獨步版曹因邊祲之究懷以皇華而諭指宣勞半歲揆

策萬全借前著籌之明於料敵賢長城遠矣賴以折衝
茲遣使以結盟尚整軍而修備已開督府命將相以視
師乃陟夏卿率賓寮而飲畫共講止戈之武以凝奠枕
之勲往服恩榮益肩忠報

張宗元司農少卿制

國家駐蹕東南宮禁之須百官之奉師兵阜隸之食皆
仰給於大農近郡新有水害朕已蠲民田租慮倉庾或
不能足用也以爾出自勲閥以材諳稱卿寺計臺所居

可紀茲用命爾掌九扈之事爾當會其多寡常使有餘
則為稱職不獨謹出內而已

韓彥古將作監丞制

朕留意武事凡將相功臣之世皆欲羅而致之以察其
可用爾好學不怠秀于其家匠監美官吾所不惜往思
振職毋或負丞

向洵提舉淮東常平茶鹽制

山澤之產所以供邦財者不一而弻海為之最淮浙閩

禹瀉鹵之地不一而淮東為之最使者非其人則國有遺利爾材健而通老于吏事把麾揭節良有可觀鹽筴之柄茲以付汝于官吏則有澄清之權于民又有常平之政往哉無瘳曠厥職

知盱眙軍郭淑直秘閣制

爵祿天下之砥石也有勞必賞能者斯勸爾材智聞敏遇事風生一障之乘弗憚險易視探虎穴如行坦途列職道山旌汝體國

權劔門縣杜萊循資制

王師出塞以食為急爾千里餽餉軍不乏興進秩之榮
用答勞効

趙密落致仕權殿前司職事制

賜安車而就第甫遂高懷護鉤戟以周廬仍尋故步人
既諳於要束朝有賴於誰何具官某氣略沉雄智謀宏
遠藝長弓劒出山西六郡之家學守韜鈴得濟北一編
之法久掌禁門之衛浸高盟府之勲會疆戍之移屯致

巖除之缺帥疇咨在列母易老臣以黃髮而治兵見赤
心之許國式崇武節可壯軍聲噫漢室置羽林之官盖
仰侔于乾象唐人有靈壽之賜亦復總於師干益勵忠
規用酬恩遇

龔茂良太常少卿制

奉常居九寺之首繇法從而下亞卿冠乎庶寮秩清而
選甚重況當始郊之年稽古禮文之事豈易屬人爾學
探淵緼溢為文華儒黨所譽素有直聲迺自六察寘之

諫坡庶幾辱聞骨鯁之論而獲拾遺補闕之益也引嫌
辭位屢挽不留陟之容臺以觀遠器

給事中吳芾轉左朝議大夫制

寄祿之階二十九等有限年無限員獨議大夫其數八
十搢紳之士官極乎正郎望之而不能至唯侍從則不
拘此法可以超軼而居之具官某直繩聳乎霜臺惠露
洽乎三郡華問瓌望靡人不知再上禁途尊我朝著茲
以黃扉之權而秉軍旅之事固不以一秩為軒輊也有

司校考實應遷品出此言縛為之寵光

忠訓郎戴青降一官制

馭軍有律亡命必誅爾逋逃自歸姑從末減尚思後効
戒此薄懲

魏勝轉右武大夫忠州團練使知楚州陳敏轉
成防禦使知高郵軍制

朕差擇猛士扞城四方邊最有聞豈緩褒典具官某忠
義自奮驚勇可推典治新邦閱日滋久控制外侮軍聲

甚張招携流通績効亦著易守淮壘謹吾藩籬用陟戎

團仍超橫列

陳敏作用陟兵防書之盟府

當思民社之寄不專軍旅

之容內撫疲氓遠固疆圉恩威相濟時乃之休

鎮江府後軍統制胡明轉武經大夫制

爾將屯遠邊久佐新壘招携控制勞効居多增秩之榮
用勸同列

知漣水軍夏俊轉武節郎制

爾忠義奮發有志功名一障扞邊備宣勞効是增命秩

以夸轅門

單時秘書王東里著作佐郎戴達先莫冲校書

郎制

冊府儲天下之材如梗枿豫章積日累月俟其昂霄聳
壑然後擇而用之爾等學行純淑選在周行或自簿領
而徙清官或仍筆削而佐太史或繇是正而進校讎併
肩群居相與言仁義之道而窮未見之書益尊所聞以
涵遠業

吳飛英太學博士制

愛其子擇師教之國家為多士選模範烏可忽也爾頃
游膠庠名出同輩推其所得不倦於誨人則有速肖之
効矣

蘇峴太常寺主簿制

爾四世祖精於禮學作太常因革書百篇行於世禮官
有討論資以折衷而無聚訟之患爾不墜家學近臣稱
之往游曲臺思贊其長

揭陽縣令余致和廣德縣令趙善禮循資制

國家除戎器以藏武庫嘗下諸郡作甲爾能勤其官先期趣辦爰進一階示信賞也

唐閔都官員外郎制

六官之屬二十四司事有劇易而郎位應列宿等耳爾學韜於中入朝久次陟之省戶俾究所長昔薛能李頻嘗為中都郎而官曹增重其思古人以稱推擇

知樞密院賀允中贈三代曾祖屯田員外郎贈

太子少保應機贈太子太保制

君子之澤五世聿流積德之光泰階所陳六符斯厚顯
親之典茲延登於碩輔復追賁於曾門具官某探道有
涯懷材弗展傲青雲而吏隱甘白首之郎潛餘慶所覃
後昆益大恩加愍冊已陟東宮之孤寵逮幽局更增一
品之秩尚其冥漠歆此休嘉

曾祖母和義郡夫人楊氏贈同安郡夫人平樂
郡夫人侯氏贈文安郡夫人制

百川之水其源深者流必遠昂霄之木其根茂者枝必
盛輔拂股肱之臣享高爵厚祿而有英聲鴻實者皆其
先世垂光委祉之効然也某氏鍾禮郝法宗姻化之克
配吉人慶延後裔副筭翟第載啓大邦庶幾泉局知此
愍飾

祖朝議大夫贈少保撫辰贈太保制

昔于公治獄多陰德乃高大其閭門令容駟馬高蓋車
謂後世必有興者其子孫踵相躡為三公天之可以責

報如此具官某被服儒術策名鼎科澤加於民僅躋卿位非此其身施於再葉宥庭政路赫赫巖瞻寵及九原進升公保營魂不昧尚克享之

祖母嘉國夫人王氏贈蔡國夫人制

朕三聘老臣再登政地宏摹肄業既尊輦于邦基卹典
襚章必寵光其祖廟某氏勤組紉之事服圖史之箴溫
慈惠和稱於宗黨蕃衍盛大燕及聞孫位既峻於台階
恩益崇於王母小君惟舊大國始荒申加刻密之封用

展含飴之報

父承議郎贈太子太傅坦贈少傅制

人子之事其親常懷三釜之養大夫之祭於廟遂伸五
鼎之儀惟時儒先復陟台輔孰慰循陔之孝爰推告第
之恩具官某種學積文道潛乎聖域砥節礪行名振乎
俊躔斂六翮以卑飛儕百僚而漫仕是生英傑胥會明
良運機籌于帷幄之中贊政化于陶鈞之上積善必得
其報教忠厥有自來幽窆甚光登春宮之傳職愍章相

繼榮左棘之新名尚其如存歆此無斁

母太原郡夫人王氏贈賀國夫人制

朕考兒齒黃髮之章見奉親之燕喜誦凱風寒泉之什
知鞠子之劬勞常優錫類之恩用達揚名之孝矧吾樞
極永愴栝棧寬其霜露之思寵以山河之象某氏性專
靜慤德稟柔嘉婉厥名儒采藻謹宗祊之薦誨其哲嗣
斷機擇師友之賢暨再應於台符徒有懷于甘旨從夫
之氏有國在南乃開紫誥之封尚作黃壚之飾光靈不

翳休寵是歆

妻永嘉郡夫人鄧氏贈吳政郡夫人制

自古士大夫以詩書起家踐于丞弼非獨祖考燾後之
祉也蓋亦有壺內之助焉某氏胄出名門輔佐君子柔
德淑範齊芳管彤饋祀有年不克偕老已正魚軒之貴
具膺鸞誥之榮改昨大邦式賁泉壤

范榮忠州防禦使制

朕記人之功惟恐事同而賞異師還遠徼可無飲至之

恩乎具官某登鋒履刃衆推拳勇誓川扣楫有志古人
比總舟師往臨海道扞禦外侮威聲甚張歸休淮濱未
忘武備班勞出綍用進州防益思奮忠以答殊獎

王選高州刺史制

朐山之役累月交兵猛士登陴乘機戰野摧陷強敵廓
清重圍守將之功爾居其最茲出褒典寵以州旗益思
竭忠用答恩獎

郭剛達州刺史制

日者塞騎闖邊薄我瓜渚爾輸忠賈勇誓掃妖氛陷陣
卻敵厥功茂焉遙領州符茲為醴賞益圖衛社以保榮
名

徽猷閣待制周執羔封贈父朝奉大夫致仕庭
俟贈右朝請大夫制

朕嗣服之始慶覃中外禁近之臣時方端憂則俟其御
祥琴而推禰廟之澤所以教天下之孝也具官某盛德
著於州閭美名馳於仕路一經教子入從出藩黃髮龐

眉享其榮養新阡屬適祔典鼎來追命文階用光廟祀
母宜人吳氏贈令人制

婦人從夫與子而貴夫為大夫子為卿夫存則封邑不
可踰其爵今亡矣故視其子無嫌也某氏徽柔莊靖夙
著壺彝三徙其隣克成賢嗣降年不永板輿養闕宜家
美號昔繫其夫聖善令名茲因其子推此協華之澤慰
夫念母之心

繼母宜人劉氏贈令人制

朕覃踐阼之澤于四海靡間存沒況從臣之親乎某氏
出自名族嬪于儒門馴德淑行六姻所稱有子通顯伸
其孝思重泉有知歆此祕典

劉大辯大府寺主簿制

朕比下省官之令雖中都亦去冗員故九卿之屬丞簿
不並置惟司府兩丞亦得以簿代之蓋職掌文書之繁
俟人而後舉也爾以儒術決科好談古今治亂事勾稽
之任姑試爾才益據所長以若予采

度支員外郎吳巖陞郎中制

在廷百官惟尚書郎以資厯淺深而為之別若身登省
戶則疇昔歲月雖分陰不棄也爾少有雋譽久於剴繁
司度劇曹甫觀所蘊爰稽官簿當應星文服此寵榮益
思自勉

商江等贈官制

爾等奮發忠勇氣靖烽烟力戰喪元名則不朽寵之命
秩式表重泉

賀允中資政殿大學士致仕制

出而謀國老成厥有典刑退則潔身君子所其明哲惟
時碩輔復返故山乃發渙章以先行李具官某志矯富
貴行中表儀強識博聞學周公仲尼之道同工異曲有
相如揚雄之風蚤踐禁涂進聯政路結眷知於太上播
膏澤於域中凡造膝之所陳或嬰鱗而不避朕有懷者
德迎枚乘以蒲輪以壯本朝坐子房於籌幄淵然素蘊
卓爾遠猷所賴股肱之良豈拘筋力為禮覽封章之相

繼納祿賜而欲歸念踰七望八之年愍勞以事圖咸五
登三之治重惜其行勉遂初心用還舊物特款清間之
燕式全體貌之恩噫終始三休不改赤松之樂古今一
揆莫難黃髮之留尚期存闕之忠無廢憂時之論益顯
頤養永介壽臧

李進右武大夫制

瓜渚之役妖氛甚張儻非臬俊之臣孰建盪平之績具
官某精忠自誓勁勇不羣擐甲執兵蓋將死敵擐旗斬

將有以安邊既掃欃槍遂全壁壘宜陟橫階之峻用增
尺籍之光益務捐軀以酬恩渙

吳芾吏部侍郎制

中臺六職小宰之列甚高選部三銓右班之事最劇欲
揀放紛淹滯之失須得嚴勁詳明之人克允僉期時惟
邦傑具官某學足以適先王之正識足以燭天下之微
頃獨步于臺端茲再儀于禁密批敕如風霜之舊纔見
一班執政有瓜葛之嫌猥陳三至方賴回天之助勉從

易地之除大振紀綱盡資藻鏡革此舞文之弊副吾立武之心益崇令名以對殊遇

陳俊卿知泉州制

閩粵之區泉南甚大儻非慈惠忠信之長曷繼中和宣布之詩茲得其人無媿於古具官某器範夷雅議論通明蚤登鼎科休有華問振紀綱於憲府妙言語於綸闈頃畀是邦以疾為解顧左符之久闕申前命而復行既里社之相鄰宜民情之素習當勵維良之政慰其來慕

之思

王槐孫趙壬楊友循資制

西師出塞屢奏膚公爾奔走供軍前後無闕班勞進秩服此寵休

呂擢直徽猷閣知建康府制

長江古為天塹建業今作陪都非智略輻湊有兼人之長者不足以稱方伯連率之職爾才具縱橫馳聲州縣盤根錯節迎刃有餘召對便朝信其可用乃躋延閣超

畀麟符夫高牙大纛掌我北門之管其望甚重地居水
陸舟車之衝一都會也其事甚繁內有熊羆七萃之所
屯外有扞防疆場之所係其責甚大惟剛柔相濟施置
協中則可以無過舉而有能名勉之哉勿負予飾擢之
意

保義郎閻揆降一官制

大治至行在所纔二千里爾部督綱舟私輒貿易所過
逐利踰年始來姑鐫一官服我輕典

敷文閣直學士王大寶轉一官致仕制


閔勞以事朝廷施優老之恩歸絜其身君子具遺榮之
美式遂雅志用增令名具官某養氣至剛逢原有要瑞
於鱷水世謂間生策之龍墀士皆斂避久邇迴於外服
晚馳驚於禁途得難進易退之風鑒倒行逆施之迹夫
引年知止所貴乎近臣稱疾旬休曷虞乎清議茲披來
牘盡出至誠俾陟文階以娛里社光爾桑榆之景視茲
綸綍之言

李益謙戶部員外郎制

國家養兵之費浸廣取財之路難增欲不益賦而用度足故地官甚難其選雖大小司徒心計於其上而為之屬者可不擇哉爾學有淵源行中規矩久於外官更事甚習便坐賜對詳整可采郎官上應列宿躡次而進當思有以助其長則予汝嘉



盤洲文集卷十九



總校官進士臣胡榮

校對官編修臣楊壽楠

謄錄監生臣王錡